

In clar signal en favur dil romontsch

Il gimnasi dalla claustra da Mustér introducescha la matura bilingua romontsch-tudestg

DA HANS HUONDER/FMR

■ **Naven digl onn da scola vegnent san scolares e scolars dil gimnasi dalla claustra da Mustér sepreparar per la matura bilingua cun romontsch e tudestg. Quella maturitad bilingua ei in model grischun pusseivels dapi entgins onns ed adattaus per gimnasigs pigns.** «En connex cull'adattaziun digl urari che pertucca l'informatica havein nus decidiu d'introducir la matura bilingua romontsch-tudestg», di il rector *Tom Etter*. Aschia han scolares e scolars naven dalla tiarza classa mintgamai la pusseivladad d'eleger quella via. Aschilunsch ch'igl Uffeci per la formaziun media-superiur dil cantun Grischun accepta la damonda – quei che duess en sesez esser ina formalitad sin fundament dall'ordinaziun – vegnan 16 scolares e scolars romontschs a saver nezegiar quella pusseivladad il proxim onn da scola. Scolares e scolars san naturalmein decider sezs schebein els vulan eleger la matura bilingua romontsch-tudestg ni buc. «Dua tiarzas da nossas scolares e da nos scolars san romontsch, aschia che nus quintein ch'igl interess persuerter seigi segir avon maun», di Etter. Per biars seigi il romontsch era il lungatg duront la pausa, avon e suenter scola ed a casa.

Historia per romontsch

Per contonscher il status dalla matura bilingua romontsch-tudestg sto il gimnasi garantir quater lezziuns da romontsch per jamna sco era duas lezziuns en romontsch en auters roms. La scola claustrala porscha quell'as duas lezziuns en historia. *Alberto Palaia* – in dils magisters romontschs al gimnasi – garantescha quell'instrucziun romontscha en historia: «Historia vegn instruiu en in lungatg universal ed ei en quei senn fetg engrazievels pil romontsch.» Palaia instruescha dil reminent era romontsch al gimnasi a Mustér. «Schegie che nus havein



Il rector dil gimnasi dalla claustra da Mustér *Tom Etter* (sen.) ensemen cul magister da romontsch e historia *Alberto Palaia*.

FOTO HANS HUONDER

gia adina fatg bia pil romontsch lessen nus tuttina dar cun quella purschida nova cheu in signal en favur dil romontsch», di Etter. Quella caschun sepscha sin fundament dall'ordinaziun davart ils gimnasigs dil cantun Grischun. Las premissas per la maturitad bilingua grischuna vegnan descrettas egl artechel 7. Sebasond sin quel entscheiva l'instrucziun da quella egl emprem dils quater onns da gimnasi. Igl urari sto cuntener quater lezziuns romontsch e duas lezziuns da romontsch en biologia, historia ni geografia. Ch'ins ei sedecidiu a Mustér per historia sco rom dalla maturitad bilingua ha aunc in motiv: «Il mument mauncan

a nus magisters romontschs pils auters roms.»

Material didactic maunca

In dils problems che seprenta pertuccont l'instrucziun da historia per romontsch ei il material d'instrucziun. «Per romontsch dat ei fetg pauc. La scola cantunala ha rimnau empau ils davos onns. En quei senn dat quei empau lavur supplementara», di Palaia ch'ha gia instruiu pli baul plirs onns historia per romontsch al gimnasi e ch'ei dil reminent era president dalla Surselva Romontscha. En quella funcziun di el: «Ei legira mei natu-

ralmein fetg ch'il gimnasi fa quei pass. Mustér ei buca mo sisum la Surselva, mo bein ei era ina dallas grondas vischnauncas romontschas. Jeu saiel denton era ch'il gimnasi ha gia fatg fetg bia ils davos onns en favur dil romontsch.» Per scolares e scolars ch'elegian la via dalla maturitad bilingua ei il romontsch igl emprem ed il tudestg il secund lungatg. «En quei connex vegn il tudestg segiramein buc alla cuorta. La gronda part dils roms dalla matura ei tonaton per tudestg», di Etter. Dils cuosts anora sedat pil gimnasi in quen neutral. Las duas lezziuns supplementaras per romontsch vegnan indemnisadas dil cantun.

TRUN TURISSEM

Daniel Tuor niev president

(cp) Normalmein salva l'uniun Trun Turissem sia radunonza generala la primavera. Per motivs enconuschents ei quei buca stau pusseivel uonn. Ils 26 da zercaldu ha Trun Turissem denton saviu far sia radunonza da maniera usitada e normala. La presidenta, *Renata Decurtins-Deplazes*, ha saviu beneventar il bi diember da ver 30 commembras e commembres ella Pizzeria Ristorante da Stefano. La radunonza ha priu in decuors speditiv e legreivel. Tuttas propostas dalla suprastanza ein vegnidas acceptadas unanimamein. Il quen annual per 2019 muossa in surpli d'expensas da ver 26000 francs. Quella sperdita seresulta dalla cumpra d'in quad, ina maschina ch'ei necessaria per tener liber la senda da viandar duront igl unviern. La situaziun finanziaria dall'uniun ei denton buna malgrad quell'investiziun.

Elecciuns ein stadas el center

El center da quella radunonza ein las elecciuns stadas. La presidenta, *Renata Decurtins-Deplazes*, ha abdicau suenter plirs onns da grond engaschi per saver se dedicar ad autras caussas. Legreivlamein ei *Daniel Tuor*, anteriur president communal e commember dalla suprastanza da Trun Turissem, staus prompts da surprender igl uffeci da president ed ei el vegnius eligius cun acclamaziun. Pil post vacant en suprastanza ei il giuven *Remigi Maissen* vegnius eligius. La suprastanza da Trun Turissem secumpona ussa sco suonda: *Daniel Tuor*, president; *Esther Tomaschett*, vicepresidente; *Roland Albin*, *Erica Cavegn* e *Remigi Maissen*. Secretariat: *Rita Wolf*. Suenter 13 onns han ils dus revisurs da quen *Lucas Arpagaus* ed *Urs Gautschi* remess lur uffeci. En lur stagl ha la radunonza eligiu *Gabriela Vincenz* e *Donat Albin*. Allas persunas ch'han remess lur uffeci ei vegniu engraziu cun in applaus e cun in regal. Gratulaziuns e buns giavischs ha ei dau pils niveligi.



MAD

Tempo 30 sin la Via Nova a Domat

La vischnaunca da Domat ha migliurau la segirtad sin la via da transit tras il vitg

■ **L'introducziun da tempo 30 sin la via principala ei savens in politicum. A Sumvitg ein vischins i entothen avon Dertgira federala e quai cun success ed en Lumnezia ha il suveran refusau in'iniziativa che vuleva puspei abolir tempo 30 ch'era vegnius introduciv paucs onns avon tras il vitg da Cumbel.** A Domat ha la reducziun dalla spertad occupau sur onns la populaziun. En connex culla sanaziun dalla Via Nova ei tempo 30 uss era daventaus realitad sil tschancun denter Coop e Crusch Alva. Era procura il passapei – sche era parzialmein fetg strengs – per dapli segirtad. Quel ei denton smuttaus e la via ei munda cun ina «cuvrida scutinonta». Ch'ei dat ussa dapli segirtad sin la via principala tras il vitg ei il meret dil comite d'iniziativa «el center tempo 30» ch'era vegnius fundaus 2016 digl apotecher *Max Caviezel* e *Gustav Ott*.

Success dubel

Iniziant ed interessai ein vegni envidai dacuort ad ina pintga fiasta da ventschidas ch'ha giu liug sper la fontauna dil vitg nua che l'iniziativa ch'ha ussa purtau success era vegnida lantschada. Cun quella caschun han ils iniziant denton era saviu presentar ina novitad brisanta: Era la sdrema da pedunzs avon l'apoteca – ch'ei stada dispoteivla – ei ussa realisada. «Las sdremas melnas ch'eran vegnidas abolidas a sias uras a moda clandestina dalla polizia cantunala ein ussa puspei en lur

liug», aschia Caviezel. Ord indignaziun enviars quell'acziun capitada tut alla metta d'allontanar senza hau ni mau e d'in mument sin l'auter las sdremas da zebra era la finala seformau avon quater onns in comite. Enteifer paucs gis ha il comite giu rimnau las sutscrizziuns per in'iniziativa dil pievel «Tempo 30» el center e passadis segirs per pedunzs. Il cantun haveva numnadamein giu allontanau per motivs polizials las sdremas verdas en quei liug. «Ina buna fin e tut ei bien», selegra Ott ussa per quei success dubel. Per festivar quei success a moda

dueivla haveva el rasau ils 10 da settember 2016 tier ina sentupada cun iniziant e gidonters sur la via vi in teppi mellenverd sco cuvrida. Era sche quell'acziun ha cuzzau mo in gi eis ella tuttina stada en buna memoria a biars.

Traffic plaun gia 1925...

L'intenziun dils iniziant ei vegnida sustenida ton dalla suprastanza communal sco dil cussegl da vischnaunca. Senza retard ei l'istanza vegnida empalada vnavon per lubientscha alla polizia cantunala. La tractaziun sappi denton cuzzar

meins ni schizun onns, havevan ins dau d'entellir lezza gada el parlament communal. Dapi lu ein quater onns spirai. Il president communal *Erich Kohler* ha exprimiu siu plascher e sia satisfacziun davart la formaziun nova dalla via da transit tras il vitg e ch'era il cantun hagi la finala suenter liungas contractivas acceptau da resalisar ina sdrema per pedunzs. Il president dils burghais e historicher local *Theo Haas* ha menziunau en siu salid ch'ins hagi la finala giu acceptau igl onn 1925 – suenter 10 emprovas vanas – da schar cursar automobilis tras il vitg, quei denton mo «el tempo d'ir a pei» e quei sut smanatscha da castig, sco quei ch'ins hagi saviu leger da gliez temps sin tablas postadas all'entschatta dil vitg. Oz seigen ins pia per aschidadir puspei leu nua ch'ins eri avon bunamein 100 onns.

Il cusseglier guvernativ *Mario Cavigelli*, oriunds e domicilius a Domat, ha tradiu ch'il cantun hagi era fatg tras el decuors dils onns ina certa midada da meini damai che l'impurtonza dalla segirtad da traffic sin la via cantunala seigi carschida. Sper la fontauna dil vitg, leu nua che tut haveva giu entschiet, ei il comite d'iniziativa tempo 30 vegnius dissolvius officialmein e quei cun il vin da burghais e pizza. El sa seludar d'aver contonschiu sia finamira da contonscher dapli segirtad sin la Via Nova, quei grazia a «la pressiuon da sutensi» e cul sustegn dallas autoritads.



Tut ha la finala priu ina buna fin: Il president communal *Erich Kohler* ed il comite d'iniziativa cun *Gustav Ott*, *Max Caviezel*, *Toni Willi*, *Christian Müller*, *Albert Bilgerig* e *Theo Haas*.

FOTO BENNO WILLI

GLION

Autokino sin plaz fiera

(rtr/fmr) La situaziun cul coronavirus sveglia la creativtad. Sco en biars auters loghens dalla Svizra vegn era purschiu a Glion in autokino. La fin d'jamna dils 9 entothen ils 11 da fenadur 2020 sa vegnir mirau films digl auto anora, sil spazi dil plaz fiera che stat a disposiziun persuerter han rodud 100 autos plaz. Sco quei che *Kevin Brunold*, menader da Surselva Turissem, di vegn il tun dils films emess via frequenzas d'UKW directamein els autos, aschia che las immisiuns da canera ein minimas. Reservaziuns da plaz san succeder per telefon, aschi bein sco empustar enzargi da beiber e da magliar. Sul telefonin succedan era ils pagamenti. Ils organisaturs ein spanegiai sigl interess per quei arranschament: Ir a kino, esser denter la gliued e tuttina egl agen auto.

Claudio Willi/mc